

[Augsburg], 20. Juli 1580

An Theodor Zwinger

UB Basel, Fr. Gr. I 11, fol. 358r.

S. Binas tuas literas, utrasque Cal[endis] Iunij datas (sed in posterioribus debere Iulij Cal[endas] esse suspicor) diuersis temporibus accepi: mihi periucandas: tum quod nullam animi tui factam esse offensionem, ob nugas meas typographicas, significas: tum quod easdem candidè probas. Remuneratione autem nulla est opus. Quantum enim adhuc ἀντὶ τοῦ Παγκοσμίου ἀμφιθεάτρου (ne alia complura tua et mihi peropportuna officia repetam) debeam: et agnosco, et me soluendo non esse, doleo. Faxit Deus, ut nostra studia sint scholis, ecclesiae et reipublicae utilia. Ac de tuis eruditissimis lucubrationibus nullum est dubium. Meas in puluere scholastico haerere, nec ulterius progredi, facilè patior. Mitto nunc Episcopio additiunculas in quaestiones Officiorum, Suidam Latinum, Epictetum, Cebetem Graecolatinos, omnia recognita et auctiora: breui σὺν θεῷ missurus etiam Camerarij senioris in Graecum Suidam annotationes. οὕτω τὸ γῆρας τούμὸν, τὸ μὲν σῶμα πονήρως (!) ἔχει: τὴν δε ψυχὴν φιλοπόνως. Δόξα καὶ χάρις τῷ πολυελέω θεῷ, τῷ ὥνσαμένῳ με λιθιάσεως, μυρίων θανάτων ἀλγεινοτέρας γενομένης. Epicteti epistolas (quoniam Isingrinium in Graeco Simplicio ὀλαζονεύεσθαι intelligo) per amicos à Petro Victorio ut impetrem, operam dabo. D. Taurello et Pusereutto bene prospectum esse confido. Vale. 20 Iulij Anno 1580.

Tuae Excellentiae
Studiosissimus
Hiero[nymus] Wolfius.